

Urrutikoetxea eta Esparzari zigorra berretsi die Auzitegiak, eta Prieto xuritu egin du

Josemi Esparza aske geratu ostean Espainiara dezakete, egoitza debekua duela eta

Hur Gorostiaga / Baiona

Parisko Dei-Auzitegiak Egoitz Urrutikoetxea eta Josemi Esparzari joan den azaroan Korrekzio Auzitegiak ezarritako hiru urteko presondegi zigorra berretsi zien atzo. Aitzitik, Geronimo Prietoren kontrako zigorra xuritu zuen; hots, kargurik gabe libre utzi zuen. Urrutikoetxea eta Esparza heldu den asteetan dira presondegitik ateratzekoak, baina Esparza Espainiaratu dezakete.

IRAGAN azaroan lehen instantziako Korrekzio Auzitegiak hiruna urteko presondegi zigorra ezarri zien hiru gazteei. Prieto eta Esparzak epaia helegin zuten zigorra salaturik, eta Urrutikoetxearen kasuan Irene Stoller prokuradore edo fiskalak egin zuen berehalako helegitea, zigor aski gogorra ez zelakotan. Dei-auria ekainaren 15ean egin zen, eta fiskaltzak zigorraren gogortzea galdegin zuen. Polizi auto batzuen erretzeari buruzko dosierra bazen ere, fiskaltzaren ordezkari den abokatu nagusiak ETako dossier gisa sailkatu nahi izan zuen afera, Urrutikoetxearen aurka sei urteko presondegi zigorra galdeginik eta bertze biei bosna urte.

Parisko Dei-Auzitegiko epaimahaiak fiskalak galdegindako zigorraren gogortzea ez zuen onartu atzo. Urrutikoetxea eta Esparzaren kasuan Korrekzio Auzitegiak ezarritako hiruna urteko presondegi zigorra baieztatu zuen. Josemi Esparzaren kasuan, horrekin batera, Frantzia bizitzeko lurralde debekua berretsi zion epaimahaiak atzo, Korrekzio Auzitegiak galdegin bezala. Espainiar Estatuan sortutakoa denez, nortasun agiri espainiarra du eta zigorra betetzean presondegitik libre atera ordez, Espainiara lezakete, Frantziak lehenago Hegoaldeko hainbat euskal presorekin behin eta berriz egin izan duen bezala.

Geronimo Prietoren kasuan, berriz, Dei-Auzitegiak Korrekzio Auzitegiaren kontrako iritzia agertu zuen atzo. Bederatzi hilabetez preso egon ondoren, auzia bitartean libre gelditu zen, baina lehen auzian hiru urteko pre-



Geronimo Prieto ekainaren 15ean dei-auria izan zenean Parisen.

sondegia ezarri zioten azaroan. Atzo, aldiz, bere kontrako kargurik ez zegoela eta, xuritu zuten Prieto.

Prieto libre eta Egoitz Urrutikoetxeak bi urte eta erdiko presondegia beterik heldu den egunetan aske uztekoa dutenez, bi urte eta bost hilabete presondegian daraman Esparzaren kasua dago ikus-teke.

Gazteriak gazte erakundeak, epaia «jadanik betetako presondegia justifikatzeko» emana izan dela salatu du, «auziperatuak izan aitzin kondenatuak izanki erruga-

betasun printzipioa» zapaltzen dela gehitzeko. «Guretzat argi da Gazteriak kide izateagatik igaro dituztela hainbeste hilabete presondegian», azaldu du. Hala ere, zigorra gogorragoa izan zitekeela kontuan izanik, «epaia eskatutakoa baino apalagoa izatearen arrazioa mobilizazioari esker» izan dela azpimarratu dute, auzia aitzin egin duten kanpaina gogoratuz.

Gureak presoen senide eta lagunak elkarteak, berriz, bereziki salatu du Prietok bederatzi hilabete presonde-

gian debaldetan pasatako denbora, hastapenetik bere kontrako karguen arintasuna agerikoa zela azpimarraturik.

Epaia finkoa bada ere, parteek helegin dezakete oraino. Baina Kasazio Gortera helegiteko, epaiaren legezotasuna edo auzibidean forma aldetik irregularitasunen bat egotea egotzi beharko dute parteek.

Bestalde, Prietok damu domaiak edo kalteordainak eskatuko ditu egin ez duen delituagatik 9 hilabete eman baititu presondegian, eta bi urte eta erdi auzibideetan.

Telefono entzuketa baliogabe

■ ATZOKO epaiaren azalpena oraino zabaldu ez badute ere, Geronimo Prieto xuritu izanak telefono bidezko entzuketaren ustezko froga baliogabea dela adierazi du. Prietori sabotaia baten aldarrikapena telefono bidez egitea leporatzen zioten, bi polizi adituk egindako ikerketek bere ahotsa zela baitzioten. Defentsak, aldiz, bere errugabetasuna aldarrikatzeaz gain, halako entzuketek komunitate

zientifikoarendako baliorik ez dutela adierazi zuen, fidagarritasun eskasegia zela argudiatu-rik. Gisa horretan, unibertsitate irakasle, aditu zientifiko, hautetsi eta hainbat gizarte eragileren sustengua jasoa zuen Geronimo Prietok.

Prietoren kontrako frogarako elementu bakarra polizi adituen ikerketa horiek izanki, bere kontrako frogak asmatzeari ekin zi-

tzaiola salatu zuen defentsak auzian, euskaldun gazte eta abertzale izatea delituen heinera pasanahia arbuiatzeko. Izan ere, polizien kontrako ekimen bati buruzko polizi adituen ikerketan oinarritua zen akusazioa.

Epaia hainbat epaian entzuketa bidezko identifikazioa baliogabetzat jo du, eta ondoren sor litezkeen kasuendako aurrekari izan daiteke hartu berri den

erabakia. Orain arte, hatz markak eta bereziki DNA dira segurtzat jotzen diren identifikatzeko frogak.

Geronimo Prieto berak, militante abertzalea izateagatik komisaldegia, presondegia eta bi auzi iragan behar izana salatu izan du etengabe, bai eta auzitegian berean. Hala, bederatzi hilabete espetxean igaro izanagatik kaleordaina eskatzeko asmoa azaldu du.

Lizarra-Garazik proiektu politiko bat aurkeztu beharko lukeela dio ABK-k

■ 4. Biltzar

Nazionalarekin bat, ekimen soberanista izatera igaro da Autodeterminazioaren Biltzarrak

Erredakzioa / Donostia

LIZARRA-GARAZIKo indar politiko, sozial, eta sindikalek Euskal Herriko herritarren onespina lortuko duen proiektu politiko bat aurkezteko gai izan behar dute, Autodeterminazioaren Biltzarraren arabera. «Etorkizun hurbilean, lehenbailehen, egitasmoa idazteko eta praktikan jartzeko gai» izan behar dutela azaldu du gizarte mugimenduak, iragan asteburuan egindako 4. Biltzar Nazionala dela eta kaleraturiko agirian. Proposamen hori konfliktiboa izan daitekeela jakin arren, behingoz funtsezko eskubideak zapaldu gabe gatazka bideratzeko aukera dagoenean beldurrik ez dela izan behar azpimarratu du ABK-k.

ABKren ustetan, Lizarra-Garazi gertaera historikoa izan da: «Ez da soilik ETaren su etena bultzatu duen eragilea izan, baizik eta Euskal Herriak behar duen marko juridikoko politikoaren aldaketa lortuko duen eszenatoki berriaren hasiera». Agirian diotenez, Lizarra-Garazik bortizkeria politikoaren inguruan zegoen zatiketa aldatu du, eta egoera horren aurrean ABK-k Euskal Herriak autodeterminazioa erabiltzearen alde lan egin nahi du.

Lau urte gogor izan dituztela gogorarazi dute agiriaren bitartez. Besteak beste, autodeterminatzailer sektoreen artean zubilana egiten saiatu direla eta Euskal Herriarentzako eszenatoki berria lortu nahian aritu direla nabarmendu du Biltzarrak. Era berean, orain arteko desobedientzia zibila bigarren maila batean utzi eta ekimen soberanista izatera igarotzen ari direla ezagutarazi dute.

Euskal Herriarentzat legeen lege bat lortzen laguntzeko konpromisua ere adierazi du: «Lege honek herriaren subirotasuna aldarrikatu behar du».